

مسرحية

مسرحيه صارت الدنيا بعيوني
وانتي اجدر من لعب دور البطوله
ياملاك الحب عفوا... ياجنوني
لوسمحتي بخاطري شي بقوله
بسالك وشلون خابت بك ظنوني
وكيف هانت عشرتي معك بسهوله
وليه كنتي توصفي حالك بدوني
مثل وادي ينتظر تجري سيوله
هو غبا مني تسيرني شجونني
او غبا اتبع خفوقي في ميوله
او غبا صديت عن ناس نهوني
ثم ضربت الكون في عرضه وطوله
وانصحوني ..وانصحوني.. وانصحوني
لا تجي خطوات رجلينك عجوله
وكننت اكابر واحلف انك ماتخوني
لين جتني طعنك في صدر يوله
فعلتك تمحا ويبقى يافتوني
شي واحد وان سمحتلي بقوله
انتي اعلم من اكون ومن تكوني
والجبل ما هزته ريح خجوله

فيصل العدواني



هذا غيابك مرني الليلة ويقريني السلام
وانا غيابي حاضرا الليلة في زهو الأسئلة
غبتني غياب ماترك لي غير حزن مستهام
في وحدتي يبني على عرش إنكساري منزله
من علمك تبني بغيابك معاويل الهدام
في ذاكرة صوت نما بسمك وفي الذات اشعله
انتي بداية كل ما لا ينتهي عطر الكلام
انتي نهاية كل ما لا يبتدي شوق ووله
انتي ملامح طفل شدة نبض صدر امه ونام
تقرا بوجهه من شفاة امه حنان وبسمله
صمتك ظلال الغيم.. لمع البرق.. هتان الغمام
بوحك عصافير عطت للضي غي السنبلة
بسمتك فرحة ضيف جايح في قرى بدو كرام
ومعذبه من كثر جوده فك صدره وادخله
انتي ليا قلتي احبك ثارت الدنيا قيام
واحس كني في بدايات الطريق من اوله
وانا متى ما قلت احبك يرتجف جفن الظلام
والصبح يتنفس مكاني والصعب استسهله

ردة السفيناني

